

आकाशवाणी

Headlines

प्रधानमंत्री नरेन्द्र मोदी अज्ज पच्छिम बंगाल दे दौरे पर जागंन जित्थे ओ 3 हजार 2 सौ करोड़ रुपें दियें जरनेली सिड़के सरबन्धी परियोजनाएं दा शुभारम्भ करगंन।

प्रधानमंत्री नरेन्द्र मोदी अज्ज असम बी जागंन जित्थे ओ 15 हजार 6 सौ करोड़ रुपें दियें विकास परियोजनाएं गी शुरु करोआगंन।

गृहमंत्री अमित शाह होरें आखेया जे पिच्छले 11एं बरे च अगली पीढ़ी दे बुनियादी ढांचे गी विकसित करने च बड़ी मती प्रगति दर्ज कीती गई ऐ।

भारत ते नीदरलैंड नै समझौता जापन दे माध्यम कन्नै भारत- नीदरलैंड संयुक्त बपार ते निवेश समीति- JTIC दी स्थापना दी घोषणा कीती ऐ।

दुबई च कल खेड़डे गेदे अंडर-19 एशिया कप दे सैमीफाईनल च भारत नै श्रीलंका गी 8 विकेटें कन्नै करारी शिकस्त दिती ते हून फाईनल च ओदा मुकाबला पाकिस्तान कन्नै होगा।

मर्दे दे क्रिकेट च भारत नै कल रातीं अहमदाबाद च मौजूदा श्रृंखला दे 5में ते अखीरले टी-20 अंतराष्ट्रीय मैच च दक्खन -अफ्रीका गी 30एं रन्जें कन्नै हराइयै श्रृंखला 3-1 कन्नै जिती लैती।

<><><><><><>

PM-WB

प्रधानमंत्री नरेन्द्र मोदी होर अज्ज पच्छिम-बंगाल दा दौरा लागंन। दौरे दौरान नाडिया जिले च राणाघाट थाहर 3 ज्हार 200 करोड़ रुपे दी लागत आहली दंडु राष्ट्रीय जरनेली सिड़क परियोजनाएं दा उदघाटन ते नीह पत्थर रखगंन। प्रधानमंत्री हुंदा इस मौके पर जनसभा गी सम्बोधित करने दा बी कार्यक्रम ऐ। इन्हें दंडु परियोजनाएं दी मदद कन्नै कोलकाता ते सिलीगुड़ी बश्कार महत्वपूर्ण

सिड़क सम्पर्क बनी जाहग- जेहदे नै लक्खें लोकें गी फैयदा ते सहूलत होग। इंदी मदद कन्नै इनें दंऊ थाहरें बश्कार सफर करने च कोई दंऊ घंटें दा टैम बचोग ते गड़ियें दी आओ-जाई तेज ते सुवधाजनक होई जाहग।

<><><><><><>

PM-Assam

प्रधानमंत्री नरेन्द्र मोदी हुंदा अज्ज दपैहरी मगरा दंऊ दिनें दे असाम दौरे पर रवाना होने दा बी कार्यक्रम ऐ- जिस दौरान ओ उत्थे कोई 15 जहार 600 करोड़ रुपे दी लागत आहले बक्ख-बक्ख विकास प्रोजेक्टें चा किश दा नीह पत्थर रखगंन ते किश दा उदघाटन बी करगंन। अपने दौरे दे अज्ज पैहले रोज मोदी होर गोवाहटी दे लोकप्रिय गोपीनाथ बोरडोलोए अंतराष्ट्रीय ब्हाई अड्डे पर बनाए गेदे भलेया आधुनिक किस्मै दे बैम्बू ऑरचिड्स टर्मिनल बिल्डिंग दा उदघाटन करगंन। इक लक्ख 40 जहार मरब्बा मीटर दे इलाके च बनाए गेदे इस टर्मिनल च सलाना कोई इक करोड़ 30 लक्ख यात्रियें दी छमता ऐ। इस टर्मिनल च “बैम्बू आरचिड्स” विषय तैहत असाम दी जैविक बन-सबन्नता ते सांस्कृतिक विरसे दा शानदार छलैपा दिक्खेया जाई सकदा ऐ।

<><><><><><>

PM- WHO Summit

प्रधानमंत्री नरेन्द्र मोदी होरें आखेया ऐ जे योग नै सारी दुनिया गी सेहत-संतुलन ते सदभाव दी बत दस्सी ऐ। कल नमीं दिल्ली च पारम्परिक दोआइयें ते इलाज पद्धतियें दे बारे च आयोजित विश्व सेहत संगठन WHO दे वैश्विक सम्मेलन गी सम्बोधित करदे होई प्रधानमंत्री होरें आखेया जे पिच्छले किश बरे दौरान लोकें योग गी दुनिया दे कोने-कोने च घर-घर पुज्जदे ते लोकप्रिय हुंदे दिक्खेआ ऐ। इस मौके प्रधानमंत्री होरें WHO दे महानिदेशक डाक्टर टेडरोस एधनॉम गैब्रेयेसस हुंदे कन्नै दिल्ली च नमैं बनाए गेदे WHO दक्खन पूर्व एशिया दे क्षेत्रीय परिसर दा उदघाटन बी कीता- जेहदे च WHO दा इंडिया क्रन्ट्री दफ्तर बी होग। दिल्ली च WHO दा इस क्षेत्र दा चेचा दफ्तर खुल्लना WHO कन्नै भारत दी भ्याली दा सबूत ऐ।

<><><><><><>

Vice President –Telangana MP

उपराश्ट्रपति सी.पी. राधाकृष्णन दंडु दिने दे दौरे पर अज्ज तेलंगाना ते मध्य-प्रदेश जागंन। अपनी यात्रा दे पैहले ध्याड़े उपराश्ट्रपति हैदराबाद च रामोजी फिल्म सिटी च लोकसेवा आयोगें दे अध्यक्षें दे राश्ट्रीय सम्मेलन दे विदाई समारोह च मुख्ख परौहने दे तौरा पर शामिल होगंन। एदे मगरा उपराश्ट्रपति होर कल विश्व ध्यान दिवस दे मौके पर नंदीगाम च स्थित कान्हा शांति वनम च हार्टफुलनैस वैश्विक मुख्यालय च मुख्ख परौहने दे रुपै च हिस्सा लैगंन। एदे परैन्त राधाकृष्णन होर अटल संस्थान पासेया आयोजित अटल बिहारी वाजपेई जन्म शताब्दी समारोह च हिस्सा लैने आस्तै मध्य प्रदेश दे इंदौर जागंन।

<><><><><><>

Railway Tickets

रेलवे ने स्पष्ट कीता ऐ जे डिजिटल रूप कन्नै अन-आरक्षित टिकट बुक करने आहले यात्री जांच दे बेल्ले बुकिंग लेई इस्तेमाल कीते गेदे उस्सै मोबाइल फोन पर टिकट दस्सी सकदे न। हुन ऐसे यात्रियें गी टिकट प्रिंट लैने दी लोड़ नेई ऐ। मीडिया दिएं रिपोर्टें च इस बारे दावा करने दे बाद रेलवे ने एह स्पष्टीकरण जारी कीता ऐ। इन्हें रिपोर्टें च दावा कीता गेआ हा जे रेलवे ने अनारक्षित रेल टिकटें दी प्रिंट कीती गेदी कॉपी कन्नै रक्खना जरूरी बनाई दिता ऐ। रिपोर्टें च इब्बी दावा कीता गेआ हा जे ऑनलाइन यां ऑफलाइन बुक कीती गेदी अनारक्षित टिकटें कन्नै यात्रा करने आहले यात्रियें गी अपनी यात्रा दे दुरान टिकट कन्नै रक्खना जरूरी ऐ।

<><><><><><>

Shah Real Estate

केन्द्री गृह ते सहकारिता मंत्री अमित शाह होरें इस गल्लै पर ज़ोर दिता ऐ जे पिछले 11एं बरें च अगली पीढ़ी दे बुनियादी ढांचे गी विकसित करने च बड़ी मती प्रगति होई ऐ। कल नमीं दिल्ली च कॉन्फेडरेशन ऑफ रियल एस्टेट डेवलपर्स एसोसिएशन ऑफ इंडिया यानी क्रेडाई दे राश्ट्री सम्मेलन 2025 गी संबोधित करदे होई श्री शाह होरें आखेआ जे नेशनल इंफ्रास्ट्रक्चर पाइपलाईन, भारतमाला, सागरमाला ते पर्वतमाला सने केई प्रमुख पैहलकदमिं शैहरी विकास गी बड़ा मता मज़बूत कीता ऐ ते भारत गी बुनियादी ढांचे आहली सुविधाएं कन्नै संपन्न दुनिया दे अगुआ देशें चा इक बनाने लेई स्पष्ट रूपरेखा

तैयार कीती ऐ। उ'नें इब्बी आखेआ जे इ'नें जतनें दे सकारात्मक ते असल नतीजे हासल होए न।

<><><><><><>

India –Netherland

भारत ते नीदरलैंड नै समझौता ज़ापन दे माध्यम कन्नै भारत- नीदरलैंड संयुक्त बपार ते निवेश समीति- JTIC दी स्थापना दी घोषणा कीती ऐ। ए दौनें देशे बशकार दपक्खी बपार- रास-पूँजी ते आर्थिक सहयोग गी होर मजबूत करने दी दिशा च इक महत्वपूर्ण गें ऐ। भारत दे उद्योग ते बपार मंत्रालय ते नीदरलैंड दे विदेश मंत्रालय बशकार इस समझौता ज़ापन दी औपचारिक घोषणा नीदरलैंड दे विदेशमंत्री डेविड वैन विल हुंदी कल भारत यात्रा दे मौके कीती गई। उद्योग ते बपार मंत्रालय नै इक ब्यान च आखेया ऐ जे समझौता ज़ापन च बपार ते रासपुंजी सरबन्धी मामलें पर नियमित गल्लबात ते सहयोग लेई इक औपचारिक संस्थागत ढांचे दे रुपै च इस कमेटी दी स्थापना दी प्रावधान ऐ।

<><><><><><>

Jaishankar

बदेश मंत्री डॉ० सुब्रह्मण्यनम जयशंकर होरें कल नमीं दिल्ली च नीदरलैंड्स दे बदेश मंत्री डेविड वैन वील हुंदे कन्नै मलाटी कीती। इक सोशल मीडिया पोस्ट च श्री जयशंकर होरें आखेआ ऐ जे उ'नें दौनें मुखें दे बपार, रक्षा, कृषि, सेहत ते संस्कृति सने दपक्खी सहयोग पर चर्चा कीती। डॉ० जयशंकर होरें आखेआ जे दौनें मुखें सेमीकंडक्टर, प्रतिभा गतिशीलता ते अक्षय उर्जा च नमें मौकें गी तलाशने पर बी चर्चा कीती। उ'नें आखेआ जे दौनें पक्खें आलमी सतह दे मुद्दे ते बहुपक्खी सहयोग पर बचारें दा आदान-प्रदान कीता। डॉ० जयशंकर होरें आखेआ जे भारत यूरोपी संघ कन्नै अपने नेड़मे सरबन्धें लेई नीदरलैंडरस दे समर्थन गी मता महत्व दिंदा ऐ।

<><><><><><>

Under -19 Asia Cup Cricket

दुबई च कल खेड्डे गेदे अंडर-19 एशिया कप दे सैमीफाइनल च भारत नै श्रीलंका गी 8 विकेटें कन्नै करारी शिकस्त दिती ते हून फाइनल च ओदा मुकाबला पाकिस्तान कन्नै होग। भारी बरखा दे कारण मैच चिरे शुरू होआ ते इस मैच गी 20एं-20एं ओवरें तगर सीमित करी दिती गया। पैहले बल्लेबाजी

करदे होई श्रीलंका नै 8 विकेटें दे नुकसान पर 138 रन्ज बनाए जेदे परते च भारत नै 18एं ओवरें च छडी दंऊ विकेटां मुहाइयै ए लक्ष हासल करी लैता। भारत लेई विहान मलहोत्रा ते आरोण जॉर्ज नै 114 रन्जें दी नाबाद सांझेदारी कीती। तोंआई दूए सैमीफाईनल च पाकिस्तान नै मौजूदा चैम्पियन बांगलादेश गी 8 विकेटें कन्नै हराइयै टूर्नामैन्ट शा बाहर करी दिता। कल दुबई च भारत ते पाकिस्तान दे बश्कार फाईनल मुकाबला होग।

<><><><><><>

Men's Cricket

मर्दे दे क्रिकेट च भारत नै कल रातीं अहमदाबाद च मौजूदा श्रृंखला दे 5में ते अखीरले टी-20 अंतराष्ट्रीय मैच च दक्खन -अफ्रीका गी 30एं रन्जें कन्नै हराइयै श्रृंखला 3-1 कन्नै जिती लैती। पैहले बल्लेबाजी करदे होई भारत नै तिलक वर्मा दे 73 ते हार्दिक पांडेया दे 63 रन्जें दी बदौलत 20एं ओवरें च 231 रन्ज बनाए। हार्दिक पांडेया नै छडी 16एं गेदें च अरद शतक बनाया- जेदे नै ओ ए उपलब्धी हासल करने आले दूए सब्बनें शा तेज अर्द शतक बनाने आले भारतीय बल्लेबाज बनी गे। दक्खन-अफ्रीका लेई कार्बिन बॉश नै 2 विकेट लैते। 232एं रन्जें दे बड्डे लक्ष दा पिच्छा करदे होई दक्खन -अफ्रीका दी टीम 20एं ओवरें च 8 विकेटां मुहाइयै 201 रन्ज गै बनाई सकी- जेदे च ओदे सलामी बल्लेबाजी कविंटन डी. कॉक नै सब्बनें शा 65 रन्ज बनाए। भारत लेई स्पिन गेंदबाज वरुण चक्रवर्ती नै सब्बनें शा मते 4 विकेट लैते। हार्दिश पांडेया गी मैन ऑफ दा मैच ते वरुण चक्रवर्ती गी प्लेयर ऑफ दा सीरिज चुनेया गया।

<><><><><><>